

江津縣志

風俗志

世運之盛衰於人心之聚散徵之人心之邪正於風俗之厚薄驗之故曰觀於鄉而知王道之易易也津邑古巴國地常道將撰巴志稱其民質直好義隆於孝養故其詩曰惟德實賓富貴何常我思古人令聞令望好古樂道如此其俗之樸茂可知自時厥後漸卽澆漓毋亦昌黎韓子所謂風俗隨化移易者耶夫世運之盛衰由於風俗而政教實爲轉移風俗之本今

江津縣志

卷九

風俗志

一

聖天子建中和之極浹箕畢之私別風淮雨無不慕我王風矧食毛踐土之儔敢有作好作惡各爲風氣者哉雖然竊有慮焉蜀稱沃野地界繁華揚一益二之名由來已久夫瘠土之民多勞沃土之民多佚習俗移人賢者不免今士庶之家被服敢擬王公之貴鄉鄰之宴肥鮮竟奪天府之腴淫侈驕奢爭相慕倣其流弊將有不知所底者又況異端邪說更樹之幟以爲招而奇袞蕩佚之民復厭故喜新相率而羣趨於僞嗚呼此人心風俗之憂固不僅在日用飲食間矣作風俗志

風俗

津俗夙稱文雅士皆知學前輩世家蔚然詩禮鄉隅小學卓有矩規是以人敦齒讓戶盡弦歌士習之端於茲爲著

農力穡自給高田下田早遲各別肥土瘠土開墾無遺終歲勤劬男女幾無暇日是以豐稔多收卽旱潦亦皆有備

工商各務職業場集市鎮多外省來者無重貲本頗知守法易與爲治

津地上接綦河下連巴江綦河白炭城鄉利之巴

江蔗霜糖戶利之其餘若烏梅紅橘枳椇藤麻所在多有商賈爭以爲利至今遺風故俗猶有存者津民貧富不一凡男女嫁娶裝資不拘厚薄各視其家之豐嗇爲之是以門戶雖不相敵冠婚皆得及時亦有家貧不能爲禮或因男家有故權用急期以成禮者俗云拜材頭卽此事也

喪禮不仗道流不作佛事其說已見於文公家禮放翁家訓矣然鄉俗多用之不用則親族以爲不孝故不得不假此以塗飾人耳目葬則又惑於風水之說以致久停不葬陷於大不孝者此弊相沿

已久不能驟更惟願仁人孝子設誠而致行之一  
遵家禮諸書庶使狃於時習者知所返哉  
飲食衣服向來多尙儉約近日漸趨華靡每見豪  
家過侈閭左尤而效之不數年家產破壞究不如  
儉約者之累世常存此亦風俗盛衰之一端也  
風俗之薄由於民多好訟非其本性然也弊在貪  
謀好勝訟棍又從中唆擺因而構成公案傾家蕩  
產恒必由之津邑地方頗寬人心漸趨險詐欲平  
爭訟以厚風俗非嚴懲訟師不可

民生之患最忌游惰游惰者邪惡所從生也近有

江津縣志

卷九

風俗

三

一種閒民不農不工不商不傭以酒食游戲爲事  
始猶藉此行樂久則不知顧忌弊病叢生其勢必  
至於呼朋合夥三五成羣甚且焚香結盟約爲兄  
弟爲害一方不可勝言而其故皆自游惰始古人  
杜漸防微必於此等處先致警焉

程子云治天下以正風俗爲本蘇文忠上神宗書  
謂風俗卽人之元氣愛惜風俗如護元氣津邑美  
俗頗多弊俗尙少一轉移間卽駸駸乎進於古風  
矣誰謂地大必難爲治哉

附勸俗數則

邑令 王 煌

孝養父母

好事都當做孝是第一端譬如木與水孝是本與源能孝本源好大德不踰閑不孝本源壞其餘不足觀所以孔夫子孝經曾子傳周禮鄉八刑不孝最爲先父母養兒苦從頭說一番兒在母腹內形骸便生全母血兒渴飲母肉兒饑餐到兒將生候父母心如煎恐怕難生產母子命歸泉幸喜兒出世撫育心力殫饑了經營吃冷了經營穿兒笑親歡喜兒哭親愁煩兒會行走了一走不離前兒或得了病食廢寢不眠時刻常懷抱晝夜不得閒兒

子漸長大延師學聖賢姿性或愚鈍務農習耕田或教作工賈總望兒成全又爲謀婚娶不惜費金錢倘若親鰥寡苦情更難言父爲兒不娶後母恐不賢母爲兒不嫁怕兒受顛連父母恩德大真如天無邊人子縱孝順萬萬報不完無奈忤逆輩視爲分當然小時愛父母長大性變遷妻子常厚待父母竟薄看妻罵能忍氣親責反回言妻子常飽煖父母受饑寒妻子浪花費父母莫銀錢妻子千言聽親一開口嫌妻子多自在父母苦不堪妻子病急治父母病推延養兒縱十個不令饑與寒養

親祇二人兄弟起爭端小兒屎尿穢拂拭不厭煩  
老親涕唾零心中生憎嫌如此爲人子枉生天地  
間更有有子者不如無子安作賊窩匪類愛嫖好  
賭錢酒醉便混罵人鬪便幫拳見事善唆訟詐害  
遍鄉間事發身家敗父母受牽連此等真禽獸全  
不怕神天回頭急猛省犯罪法難寬孝道如何盡  
心常在親邊對親常歡喜父母日開顏早晚常問  
候冬夏察燠寒人老食不飽飲食進旨甘人老不  
耐冷衣被多裝綿親使忙去做不敢稍遲延親老  
常在側時防行動顛謹身又節用父母自安然一

家都照樣和氣成一團家道卽貧苦菽水足承歡  
倘遇親有過進諫須婉言不從仍幾諫勿令親抱  
慙父母愛兄弟莫嗔心地偏必是我不孝返身省  
厥愆父母年紀邁衣棺早置全人老風前燭臨危  
免周旋親病急調治湯藥須自煎親亡宜哀痛俗  
文莫過繁擇日卽埋葬不可久停棺須知親去世  
入土魂魄安旣歿時致祭形聲如在焉能孝神明  
喜百祥降自天本身多福壽子孫富貴縣不孝神  
明怒災禍相接連本身多貧妖後世斷香煙報應  
真不爽歷歷載簡編作歌言欲盡不禁淚如泉憶

我年十七家貧謀硯田舌耕常在外何嘗事椿萱  
廿九膺鄉薦父沒已三年庚戌母見背癸丑挑得  
官四十學作吏忽忽一紀遷我心欲忠養雙親久  
見捐每懷罔極德終夜不成眠歲時縱祭祀親未  
嘗一鬻祿養弗及親每食甚懷慙勸爾有親者及  
早須勉旃

友愛兄弟

生我者父母難得者弟兄民物猶胞與况本同根  
生爲兄當友愛爲弟當敬恭孝道宜先盡弟道亦  
須明伯兄稱家長諸弟要聽從家中大小事咨稟

而後行酒肉必推讓言語必和平立坐依次下走  
路要隨行弟兄不相離正如影隨形兄弟時相好  
正如響應聲和氣覺洋溢吉祥滿門庭父母常歡  
喜子孫多顯榮胡爲今世人不念同胞情男兒無  
主意惟婦言是聽是非多顛倒好惡不公平不顧  
親年老分居各謀生此言得財少彼說得產輕甚  
至興詞訟求官判分明更有愚頑輩終身不相容  
分居情已薄尋釁轉無窮已財浪花盡反議親不  
公已命或不好反忌兄弟通同室操戈矛纏訟家  
同傾或有已富貴財帛常充盈朋友肯周濟兄弟

不關情又或兄弟死妻子苦伶仃他人猶借助已  
不給斗升如此蚩蚩輩錮習最難更我今說一喻  
喚爾大夢醒兄弟比手足人人了胸中兩手有一  
痛欲射難開弓兩足有一跛欲登難到峯手足都  
無損方克完我躬一箭容易折箭多折不能兄弟  
敦和好外侮自不生姜肱被同卧田真荆再榮温  
公盡弟道身列宋名卿王覽盡弟道數世作三公  
效法前世人福壽日加增若不急猛省不弟有常  
刑

親睦宗族

宗族有遠近祖宗一體分人之有宗祖猶身百骸  
存血脉常周流痛癢自關心何以今世人九族多  
不親原其不親故種種各有因或家多錢財不肯  
捨分文族中困苦者相視如路人或不自勤儉家  
道日苦貧族人求無厭不與卽生嗔或已偶顯貴  
勢利汨天真兄弟伯叔前倨傲妄自尊或已常落  
魄反以賤驕人族人富貴者鄙夷不同羣或貨財  
相爭不念五服親或意見偶乖頓忘天顯恩或聽  
妻孥說或中他人譖彼此相詬諍傾排日紛紛甚  
至因小故屈體入公門多年訟不結官勸若罔聞

如此愚頑輩乃祖惡必深終必罹法網豈祇廢懿親何不自反念同族非他人昔年張公藝九世猶未分江州陳氏家七百口同殮凡屬宗族輩皆出祖宗身毋薄必須厚毋疎必須親長幼必有序昭穆必有倫喜則合族慶戚則合族臨族中設家塾延師課子孫多多置義田族中無苦人時時修族譜疎者亦長親卽或族單寒未能如所云亦各隨力量以自篤天親務使一族內有情又有文宗族尊長輩和藹如三春有司稱仁里君子表義門天下推望族百福自天申願我士庶類聞言各親親

諧和鄉黨

人最難處者莫如鄉黨中賢愚不一樣爭競容易生寡每爲眾暴弱每爲強凌或貴賤不睦或貧富相傾往往小事故屈辱到公庭彼固非忠厚此亦失和平要知鄉黨內居遊難絕蹤人無論親疎概接以溫恭事無論大小概處以謙冲有容德乃大好勝必凶終孟子言三反橫逆何難容顏子犯不校乃見量寬洪卽或鄉黨鬪排難解囂凌秉公剖曲直酌理又準情毋使興詞訟陰功正無窮務農積粟

民爲邦國本食爲民之天所以古聖人莫不重農  
焉稼穡眞維寶小民須力田土地各有宜燥濕不  
一般種穫必隨時耘耔須力殫毋使有曠土毋使  
有荒田毋始勤終怠毋惡勞好安珠玉不足貴菽  
粟民命關豐年多收穫倉箱滿萬千須要謹蓋藏  
萬勿輕舍旃足食備荒歲耕九必餘三毋以儲蓄  
富奢侈務外觀家有十年蓄荒年亦飽餐饑饉長  
無慮福澤自綿綿

勤儉營生

民生貴能勤勤則自不匱民生貴能儉儉則無枉

費克勤又克儉家道罔或替何以今世人勤儉不  
在意本業不經營終日貪遊戲爲士不好學爲農  
田荒廢爲工怕飭材爲商不權利好喫偏嬾做終  
多爲乞丐卽或能勤苦不儉亦無濟諸事務排場  
樽節全不記飲食求甘美衣服求華麗宮室求壯  
觀器具求工緻一切日用間無一不美備事事求  
如人錢財何能繼祖宗所蓄積子孫盡捐棄終歲  
所收藏一朝浪花費豐年尙空虛荒歉缺粗糲重  
利借人錢聊爲目前計轉眼產業空窮無立錫地  
於是寡廉恥遂無所不至弱者作餓殍强者入匪

類不但喪家業並且獲罪戾到此始追悔已晚不  
濟事何如尙勤儉富足能永世

士人敦品

士居四民首百姓所觀瞻文藝猶爲後器識最宜  
先厚重卜遠大輕薄難成全庠序學校設原爲育  
英賢責以大學事董以師儒官待士固甚重士毋  
自輕焉讀書學何事顧名仔細參孝弟須先盡忠  
信主必堅禮義嚴履蹈廉恥懷冰淵守口如瓶謹  
防意如城嚴惟恐行偶玷名教罪難寬惟恐獨不  
慎衾影終抱慙如此敦品行文章必可觀處不愧

名士出不誚素餐苟居心不善行己必多愆或干  
預公事脅制地方官或包攬詞訟不離衙門前或  
搯詐鄉愚恃符滋事端或武斷鄉曲小民多含冤  
甚至不孝弟作惡非一端斯文盡掃地禽獸儼衣  
冠縱或逃法網自問究何安我今勸你們攻苦學  
聖賢廉隅長砥礪品格自不凡言行寡尤悔何患  
不逢年學記士先志此語真的傳

教訓子弟

父兄教不先子弟率不謹子弟少年時教訓真要  
緊不好卽責罰萬勿稍容忍氣血猶未定利害多

不審知識日漸開嗜好容易引所賴賢父兄教訓  
心力盡性情教和平行止教安穩先教盡孝弟使  
之端根本越禮犯分事戒之使懍懍居心戒欺詐  
使之學忠悃待人教謙恭使知滿招損居家教勤  
儉讀書教立品士農工商業各隨性所近習慣成  
自然事事皆精敏若昧義方教子弟多愚蠢或游  
手好閒或羣賭聚飲或結納匪徒或尋仇洩忿一  
切非爲事常常不能泯甚至犯刑法父母難安寢  
與其事後悔何如先時審